

四庫全書

經部

欽定四庫全書

經部

五禮通考卷九十五

詳校官侍郎臣劉躍雲

給事中臣溫常綬覆勘

總校官進士臣繆琪

校對官庶吉士臣嚴福

謄錄監生臣劉文耀

欽定四庫全書

五禮通考卷九十五

刑部尚書秦蕙田撰

吉禮九十五

宗廟時享

元史世祖本紀中統元年十二月乙巳始制祭享太廟祭
器法服

祭祀志元祖宗祭享之禮割牲奠馬湏以蒙古巫祝致辭

蓋國俗也世祖元年秋七月丁丑設神位于中書省用登歌樂遣筆且齊致祭馬筆且齊譯典書記者十二月初命制太廟祭器法服國俗舊禮每歲太廟四祭用司禮監官一員名蒙古巫祝當省牲時法服同三獻官升殿詣室戶告牖還至牲所以國語呼累朝帝后名諱而告之明旦三獻禮畢獻官御史太常卿博士復陞殿分詣各室蒙古博爾齊跪割牲太僕卿以朱漆盃奉馬乳酌奠巫祝以國語告神訖太祝奉祝幣詣燎位獻官以下復版位載拜禮畢

世祖本紀中統三年十二月癸亥享太廟

祭祀志即中書省備三獻官大禮使司徒攝祀事禮畢
神主復藏瑞像殿

四年三月癸卯詔建太廟于燕京十一月丙戌仍寓祀
事中書以親王哈丹塔察爾王盤張文謙攝事

攝事儀其目有九 一曰齋戒享前三日三獻官以下
凡與祭員皆公服受誓戒于中書省是日質明有司設
金椅于省庭一人執紅羅繖立于其左奉禮郎率儀鸞

局陳設版位獻官諸執事位俱藉以席仍加紫綾褥設
初獻太尉位於省階少西南向大禮使立於其東少南
西向監祭御史位二于通道之西東向監禮博士於通
道之東西向俱北上設司徒亞終獻位於其南北向西
上次助奠七祀獻官次太常卿光祿卿光祿丞書祝官
讀祝官太官令良醞令廩犧令司尊彝舉祝官太官丞
廩犧丞奉爵官奉瓚官盥爵官二巾篚官蒙古太祝巫
祝點視儀衛清道官及與祭官依品級陳設皆異位重

行太廟令太樂令郊社令太祝位于通道之西北向東
上太廟丞太樂丞郊社丞奉禮郎協律郎司天生位于
通道之東北向西上齋郎位于其後贊者引行事等官
各就位立定次引初獻官立定禮直官搢笏讀誓文曰
某年某月某日享於太廟各揚其職其或不敬國有常
刑散齋二日宿於正寢致齋一日宿於祠所散齋日治
事如故不弔喪問疾不作樂不判署刑殺文字不決罰
罪人不與穢惡事致齋日惟享事得行餘悉禁凡與享

之官已齋而闕者通攝行事七品以下官先退餘官再拜禮直官贊鞠躬拜興拜興平立禮畢守廟兵衛與太樂工人俱清齋一宿赴祝所之日官給酒饌 二曰陳設享前二日所司設兵衛于廟門禁斷行人儀鸞局設幄幔于饌殿所司設三獻官以下行事執事官次于齋房之所前一日太樂令率其屬設宮縣之樂於庭中東方西方磬簾起北鐘簾次之南方北方磬簾起西鐘簾次之設十二鑄鐘于編縣之間各依神位樹建鼓于四

隅置祝敔于北縣之內祝一在道東敔一在道西路鼓一在祝之東南晉鼓一在其後又路鼓一在祝之西南諸工人各于其後東方西方以北為上南方北方以西為上文舞在北武舞在南立舞表于鄼綴之間又設登歌之樂于殿上前楹間玉磬一簋在西金鐘一簋在東祝一在金鐘北稍西敔一在玉磬北稍東搏拊二一在敔北一在祝北東西相向歌工次之餘工各位于縣後其匏竹者立於階間重行北向相對為首享前一日太

廟令率其屬掃除廟庭之内外樞密院軍官一員率軍人剷除草穢平治道路又設七祀燎柴于廟門之外又於室內鋪設神位於北牖下當戶南向每位設黼宸一紫綾厚褥一薄褥一莞席一繅席一虎皮次席二時暄則用桃枝竹席几在筵上又設三獻官拜跪褥位二一在室內一在室外學士院定撰祝冊訖書祝官於饌幕具公服書祝訖請初獻官署御名訖以授太廟令又設祝案于室戶外之右又設三獻官位于殿下橫街之南

稍西東向亞獻終獻位稍却助奠七祀獻官又於其南
書祝官讀祝官舉祝官太廟令太官令良醢令廩犧令
太廟丞太官丞位又於其南司尊彝奉瓚官奉爵官盥
洗巾篚爵洗巾篚蒙古太祝蒙古巫祝太祝宮闈令及
七祀司尊彝盥洗巾篚以次而南又設齋郎位於其後
每等異位重行東向北上又設大禮使位於南神門東
偏門稍北北向又設司徒太常卿等位於橫街之南稍
東西向與亞終獻相對司徒位在北太常卿稍却太常

同知光祿卿僉院同僉院判光祿丞拱衛使以次而南
又設監祭御史位二監禮博士位二於橫街之北西向
以北為上又設協律郎位在宮縣樂簾西北東向大樂
丞在樂簾之間又設大樂令協律郎位于登歌樂簾之
間又設牲榜于東神門外南向設太常卿位於牲位南
向監祭御史位在太常卿之左太官令次之光祿丞太
官丞又次之廩犧令位在牲西南廩犧丞稍却俱北向
以右為上又設諸太祝位於牲東西向以北為上又設

蒙古巫祝位于牲東南北向又設省饌位於省饌殿前
太常卿光祿卿光祿丞太官令位于東西向監祭監禮
位于西東向皆北上太廟令陳祝版於室右之祝案又
率祠祭局設籩豆簠簋每室左十有二籩右十有二豆
俱為四行登三在籩豆之間鉶三次之簠二簋二又次
之簠左簠右俎七在簠簋之南香案一次之沙池又次
之又設每室尊罍於通廊俎彝黃彝各一春夏用雞彝
鳥彝犧尊二象尊二秋冬用著尊壺尊著尊二山罍二

以次在本室南之左皆加勺罍為酌尊所北向西上彘
有舟坫罍又設壺尊二太尊二山罍四在殿下階間俱
北向望室戶之左皆有坫加罍設而不酌凡祭器皆藉
以席又設七祀位于橫街之南道東西向以北為上席
皆以莞設神版位各于座首又設祭器每位左二籩右
二豆簋一簋一在籩豆間俎一在籩前爵坫一次之壺
尊二在神位之西東向以北為上皆有坫勺罍又設三
獻盥洗爵洗在通街之西橫街之南北向罍在洗西加

勺篚在洗東皆實以巾爵洗仍實以瓚爵加盤坫執壘
篚者各位於後又設七祀獻官盥洗位於七祀神位前
稍北壘在洗西篚在洗東實以巾又實爵于坫執壘篚
者各位于後 三曰習儀享前二日三獻以下諸執事
官員赴太廟習儀次日早各具公服乘馬赴東華門迎
接御香至廟省牲 四曰迎香享前一日有司告諭坊
市灑掃經行衢路祇備香案享前一日質明三獻官以
下及諸執事官各具公服六品以下官皆借紫服詣崇

天門下太常禮儀院官一員奉御香一員奉酒二員奉馬潼自內出監祭監禮奉禮郎太祝分兩班前導控鶴五人一人執繖從者四人執儀仗在前行至大明門由正門出教坊大樂作至崇天門外奉香酒馬潼者安置腰輿導引如前行至外垣櫺星門外百官上馬分兩班行於儀仗之外清道官行於儀衛之先兵馬司巡兵夾道次之金鼓又次之京尹儀從又次之教坊大樂為一隊次之控鶴弩手各服其服執儀仗左右成列次之拱

衛使居其中儀鳳司細樂又次之太常卿與博士御史
導於輿前獻官司徒大禮使助奠官從于輿後至廟入
自南門至神門外百官及儀衛官止太常卿博士御史
導輿三獻官司徒大禮使助奠官從入至殿下獻官奉
香酒馬湏升自泰階入殿內通廊正位安置禮直官引
獻官降自東階由東神門北偏門出釋服 五曰省牲
器見親祀儀 六曰晨裸祀日丑前五刻太常卿光祿
卿太廟令率其屬設燭於神位遂同三獻官司徒大禮

使等每室一人分設御香酒醴以金玉爵斚酌馬湏蒲
萄尚醞酒奠於神案又陳籩豆之實籩四行以右為上
第一行魚鱠在前糗餌粉飡次之第二行乾棣在前乾
棗形鹽次之第三行鹿脯在前榛實乾桃次之第四行
菱在前芡栗次之豆四行以左為上第一行芹菹在前
筍菹葵菹次之第二行菁菹在前韭菹飽食次之第三
行魚醢在前兔醢豚拍次之第四行鹿臠在前醢醢糝
食次之簋實以稻梁簋實以黍稷登實以太羹鉶實以

和羹尊彛筭彛實以明水黃彛實以鬱鬯犧尊實以泛
齊象尊實以醴齊著尊實以盎齊山罍實以三酒壺尊
實以醎齊太尊實以沈齊凡齊之上尊實以明水酒之
上尊實以元酒其酒齊皆以上醎代之又實七祀之祭
器每位左二邊栗在前鹿脯次之右二豆菁菹在前鹿
鷄次之簋實以黍簋實以稷壺尊實以醎齊其酒齊亦
以上醎代之陳設訖獻官以下行事執事官各服其服
會于齊班廳禮直官引太常卿監祭監禮太廟令太祝

宮闈令諸執事官齋郎自南神門東偏門入就位東西相向立定候監祭監禮案視殿之上下徹去蓋簾糾察不如儀者退復位禮直官引太常卿監祭監禮太廟令太祝宮闈令陞自東階詣太祖室蒙古太祝起帝主神竅宮闈令起后主神竅次詣每室並如常儀畢禮直官引太常卿以下諸執事官當橫街間重行以西為上北向立定奉禮郎贊曰奉神主訖再拜禮直官承傳太常卿以下皆再拜訖奉禮郎又贊曰各就位禮直官引諸

執事官各就位次引太官令率齋郎由南神門東偏門
以次出贊者引三獻官司徒大禮使七祀獻官諸行事
官由南神門東偏門入各就位立定禮直官進于初獻
官之左贊曰有司謹具請行事退復位協律郎跪俛伏
興舉麾興工鼓祝官縣樂奏思成之曲九成文舞九變
奉禮郎贊再拜在位者皆再拜奉禮郎又贊諸執事者
各就位禮直官引奉瓚奉爵盥爵洗巾篚執事官各就
位立定禮直官引初獻官詣盥洗位官縣樂作無射宮

肅寧之曲至位北向立定搢笏盥手悅手執笏詣爵洗
位至位北向立定搢笏執瓚洗瓚拭瓚以瓚授執事者
執笏樂止登歌樂作奏夾鍾宮肅寧之曲升自東階樂
止詣太祖酌尊所西向立搢笏執事者以瓚授初獻官
執瓚司尊彝跪舉冪良醞令跪酌黃彝鬱鬯初獻以瓚
授執事者執笏詣太祖神位前北向立搢笏跪三上香
執事者以瓚授初獻初獻執瓚以鬯灌於沙池以瓚授
執事者執笏俛伏興出室戶外北向立再拜訖詣每室

裸鬯如上儀俱畢禮直官引初獻降自東階登歌樂作奏夾鐘宮肅寧之曲復位樂止 七曰饋食初獻既裸如前進饌儀 八曰酌獻太祝立茅苴于盤禮直官引初獻詣盥洗位宮縣樂作奏無射宮肅寧之曲至位北向立搯笏盥手悅手執笏詣爵洗位至位搯笏執爵洗爵拭爵以爵授執事者執笏樂止登歌樂作奏夾鐘宮肅寧之曲陞自東階樂止詣太祖酒尊所西向立搯笏執爵司尊彝搯笏跪舉罍良醖令搯笏跪酌犧尊之泛齊以爵授執事者執笏宮縣

樂作奏無射宮開成之曲詣太祖神座前北向立稍前搢笏
跪三上香執爵三祭酒於茅苴以爵授執事者執笏俛伏
興平立請出室外北向立樂止俟讀祝舉祝官搢笏跪對
舉祝版讀祝官跪讀祝文讀訖舉祝官奠祝版於案執笏
興讀祝官俛伏興禮直官贊再拜訖次詣每室酌獻如上
儀各奏本室之樂獻畢宮縣樂止降自東階登歌樂作奏
夾鐘宮肅寧之曲初獻復位立定文舞退武舞進宮縣樂
作奏無射宮肅寧之曲舞者立定樂止禮直官引亞獻詣

盥洗位至位北向立搢笏執爵洗爵拭爵以爵授執事者陞自東階詣太祖酌尊所西向立搢笏執爵司尊彝搢笏跪舉冪良醢令搢笏跪酌象尊之醴齊以爵授執事者執笏宮縣樂作奏無射宮肅寧之曲詣太祖神座前北向立稍前搢笏跪三上香執爵三祭酒於茅苴以爵授執事者執笏俛伏興平立請出室戶外北向立再拜訖次詣每室酌獻並如上儀獻畢樂止降自東階復位立定禮直官引終獻如亞獻之儀唯酌著尊之盎齊

禮畢降復位初終獻將行贊者引七祀獻官詣盥洗位
搯笏盥手帨手訖執笏詣酒尊所搯笏執爵酌酒以爵
授執事者執笏詣首位神座前東向立稍前搯笏跪執
爵三祭酒於沙池奠爵于案執笏俛伏興少退立再拜
訖每位並如上儀俱畢七祀獻官俟終獻官降復位立
定九曰祭馬湏終獻酌獻將畢禮直官分引初獻亞
獻官司徒大禮使助奠官七祀獻官太常卿監祭監禮
太廟令丞蒙古庖人巫祝等升殿每室獻官一員各立

於戶外太常卿監祭監禮以下立於其後禮直官引獻
官詣神座前蒙古庖人割牲體以授獻官獻官搯笏跪
奠於帝主神位前次奠於后主神位前訖出笏退就拜
位搯笏跪太廟令取案上先設金玉爵尊馬湏蒲萄尚
醞酒以次授獻官獻官皆祭於沙池蒙古巫祝致祠訖
官縣樂作同進饌之曲初獻出笏就拜興請出室戶外
北向立俟衆獻官畢立禮直官通贊曰拜興凡四拜監
祭監禮以下從拜皆作本朝跪禮拜畢退登歌樂作降

階樂止太祝徹籩豆登歌樂作奏夾鐘宮豐寧之曲奉
禮贊賜胙贊者承傳衆官再拜興送神樂作奏黃鐘宮
保成之曲一成而止太祝各奉每室祝版降自太階望
瘞位禮直官引三獻司徒大禮使助奠七祀獻官太常
卿光祿卿監祭監禮視燔祝版至位坎北南向跪以祝
版奠于柴就拜興俟半燎禮直官贊可瘞禮直官引三
獻以下及諸執事者齋郎等由南神門東偏門出至揖
位圓揖樂工二舞以次從出三獻之出也禮直官分引

太常卿太廟令監祭監禮蒙古太祝宮闈令及各室太祝陞自東階詣太祖神座前陞納神主每室如儀俱畢降自東階至橫街南北向西上立定奉禮贊曰陞納神主訖再拜贊者承傳再拜訖以次出禮畢三獻官司徒大禮使太常禮儀院使光祿卿等官奉胙進于闕庭駕幸上都則以驛赴奉進

攝行告謝儀 告前三日三獻官以下諸執事官各具公服赴中書省受誓戒告前一日未正二刻省牲器至

期質明三獻官以下諸執事者各服法服禮直官引太常卿監祭御史監禮博士五令諸執事官先入就位禮直官引監祭監禮點視陳設畢復位禮直官引太常卿監祭監禮太廟令太祝宮闈令奉遷各室神主訖降自橫街北向立定奉禮郎贊再拜在位官皆再拜訖奉禮郎贊各就位訖太官令齋郎出禮直官引三獻司徒光祿卿捧瓚爵盥爵洗官入就位立定禮直官贊有司謹具請行事降神樂作九成止奉禮郎贊再拜三獻以下

再拜訖奉禮郎贊諸執事者各就位立定禮直官引初獻詣盥洗位盥手詣爵洗位洗瓚詣第一室酒尊所酌鬱鬯詣神座前北向跪搢笏三上香奠幣執瓚以鬯灌於沙池執笏俛伏興出室戶外再拜訖次詣各室並如上儀俱畢降復位司徒率齋郎進饌如常儀奠畢降復位禮直官引初獻詣盥洗位盥手詣爵洗位洗爵詣第一室酒尊所酌酒詣神座前北向搢笏跪三上香執爵三祭酒於茅苴以爵授執事者執笏俛伏興出室戶外

北向立俟讀祝官讀祝文訖再拜詣每室並如上儀俱
畢降復位禮直官引亞獻官盥手洗爵酌獻並如初獻
儀惟不讀祝俱畢降復位禮直官引終獻並如亞獻儀
俱畢復位太祝徹籩豆奉禮郎贊賜胙衆官再拜在位
官皆再拜訖禮直官引三獻官司徒太常卿監祭監禮
視焚祝版幣帛禮直官贊可瘞禮畢太常卿監祭監禮
升納神主訖降自橫街奉禮郎贊再拜在位官皆再拜
訖退

凡大祭祀尤貴馬湏將有事勅太僕司牧馬官奉尚飲者革囊盛送馬其馬牲既與三牲同登於俎而割奠之祭品與籩豆俱設將奠牲盤酌馬湏則蒙古太祝升詣第一座呼帝后神諱以致祭年月日數牲齋品物致其祝語以次詣列室皆如之禮畢則以割奠之餘撒於南櫺星門外名曰拋撒茶飯蓋以國禮行事尤其所重也始至元初金太祝魏友諒者仕於朝詣中書言太常寺奉祀宗廟禮不備者數事禮部移太常考前代典禮以

勘友諒所言皆非是由是禮官代有討論割奠之禮初
惟太常卿設之僧格爲初獻乃有三獻等官同設之儀
博士議曰凡陳設祭品實尊壘等事獻官皆不與也獨
此親設之然後再升殿恐非誠懇專一之道且大禮使
等官尤非其職大樂署長言割奠之禮宜別撰樂章博
士議曰三獻之禮實依古制若割肉奠蒲萄酒馬湏別
撰樂章是又成一獻也又議燔胥脾與今燒飯禮合不
可廢形鹽糗餌粉飡飽食糝食非古雷鼓路鼓與播鼓

之制不同攝祀大禮使終夕堅立無其義知禮者皆有
取於其言

世祖本紀至元二年九月戊戌以將有事太廟取大樂
工於東平預習儀禮冬十月己卯享於太廟

祭祀志二年九月初命滌養犧牲

禮樂志世祖中統四年至至元三年七室樂章

太常集
禮藁云

此係卷
牘所載

太祖第一室 天垂靈顧地獻中方帝力所拓神武

莫當陽谿昧谷咸服要荒昭孝明禋神祖皇皇

太宗第二室 和林聖域天邑地宮在庭感格南北

來同典司分置曹教肇崇潤色祖業德仰神宗

睿宗第三室 珍符默授疇昔自天爰生聖武寶祚

開先霓旌廻狩龍駕遊僊追遠如生皇慕顯然

皇伯考朮赤第四室 威武鷹揚冢位允當從龍遠

拓千萬里疆誕總虎旅駐蹕西方航海梯山東西來

王

皇伯考察合帶第五室 雄武軍威滋多歷年深謀
遠畧協贊惟專流沙西域餞日東邊百國畏服英聲
赫然

定宗第六室 三朝承休恭已優游欽繩祖武其德
聿修帝懋錫壽德澤期周蠲饒惟鄉祈饗于幽

憲宗第七室 龍躍潛居風雲會通知民病苦軫念
宸衷夔門之旅繼志圖功俎豆敬祭華儀孔隆

世祖本紀至元四年十一月乙酉享于太廟 六年十

二月己丑作佛事于太廟七晝夜

祭祀志命國師僧薦佛事始造木質金表牌位十有六
設大榻金椅奉安祐室前為太廟薦佛事之始 帝位
于右后位于左題號其面籠以銷金絳紗其制如櫝

世祖本紀至元七年十月癸酉勅宗廟祭祀祝文書以
國字乙酉享於太廟己丑勅來年太廟牲勿用豢豕以
野豕代之時果勿市取之內園

八年九月丙子勅今歲享太廟毋用犧牛十月丁酉享

于太廟 九年十月壬辰享于太廟 十年九月己丑
勅自今秋獵鹿豕先薦太廟十月乙卯享于太廟 十
二年十月戊戌朔享于太廟

十三年四月庚辰修太廟八月遣太常卿托果斯以銅
爵一豆二獻于太廟九月己亥享于太廟常饌外益野
豕鹿羊葡萄酒

祭祀志十三年九月丙申薦佛事于太廟命即佛事處
便大祭己亥享于太廟加薦羊鹿野豕是歲改作金主

太祖主題曰青斯吉皇帝睿宗題曰太上皇伊克諾延
皇后皆題名諱

世祖本紀十四年正月己未以白玉碧玉水晶爵六獻
於太廟十月己未享於太廟 十五年十月己未享於
太廟常設牢醴外益以羊鹿豕葡萄酒 十六年八月
丁酉以江南所獲玉爵及坩凡四十九事納于太廟十
月乙卯享於太廟 十七年八月納碧玉盞六白玉盞
十五於太廟十二月甲午大都重建太廟成自舊廟奉

神主於祔室遂行大享之禮

禮樂志至元四年至十七年八室樂章

太常集禮云周
駁所藏儀注所

錄舞
節同

迎神奏來成之曲九成黃鐘宮二成 齊明盛服翼

翼靈眷禮備多儀樂成九變烝烝孝心若聞且見肸

嚮端臨來寧來燕

大呂角二成

詞同
黃鐘

太簇徵二成

詞同
黃鐘

應鐘羽二

成

詞同
黃鐘

初獻盥洗奏肅成之曲

再詣盥洗同後名順成之曲

至大以詞律同

無射

宮 天德惟何如水之清維水內耀配彼天明以滌

以濯犧象光晶孝思維則式薦忱誠

初獻升殿登歌樂奏肅成之曲

降同

夾鐘宮

祀事有

嚴大宮有恤陟降靡違孔容翼翼籩豆旅陳鐘磬翕

繹於昭吉蠲神保是格

司徒捧俎奏嘉成之曲

別本所錄親祀樂章詞同

無射宮

色純

體全三犧五牲鸞刀屢奏毛魚載羹神具厭飫聽我

磬聲居歆有永胡考之寧

烈祖第一室奏開成之曲無射宮 於皇烈祖積厚
流長大勲未集變伐用張篤生聖嗣奄有多方錫我
景福萬世無疆

太祖第二室奏武成之曲無射宮 天扶昌運混一
中華爰有真人奮起龍沙際天開宇亘海爲家肇修
禋祀萬世無涯

太宗第三室奏文成之曲無射宮 纂成前烈底定

丕圖禮文簡省禁網寬疎還風太古躋世華胥三靈
順協四海無虞

皇伯考珠齊第四室奏弼成之曲無射宮 神支挺
秀右壤疏封創業艱難相我祖宗叙親伊邇論功亦
崇春秋祭祀萬世攸同

皇伯考察哈岱第五室奏協成之曲無射宮 玉牒
朞親神支懿屬論德疏封展親分玉相我祖宗風櫛
雨沐昔同其勞今共茲福

睿宗第六室奏明成之曲無射宮 神祖創業爰著

戎衣聖考撫軍代行天威河南底定江北來歸貽謀

翼子奕葉重輝

定宗第七室奏熙成之曲無射宮 嗣承丕祚累洽

重熙堂構既定垂拱無爲邊庭閑暇田里安綏歆茲

禋祀萬世攸宜

憲宗第八室奏威成之曲無射宮 義馭未出螢燭

騰光大明麗天羣陰披攘百神受職四海寧康愔愔

靈韶德音不忘

文舞退武舞進奏和成之曲

別本所錄親祀樂章詞同

無射宮

天生五材孰能去兵恢張鴻業我祖天聲干戈曲盤
濯濯厥靈於赫七德展也大成

亞獻行禮奏順成之曲

終獻詞律同

無射宮

幽通神明

所重精裡清宮肅肅百禮具陳九韶克諧八佾粢
靈光昭答天休日申

徹籩豆登歌樂奏豐成之曲夾鐘宮

籩豆苾芬金

石鐸鏗禮終三獻樂奏九成有嚴執事進徹無聲神
保聿歸萬福來寧

送神奏來成之曲

或作保成

黃鐘宮

神主在室神靈在

天禮成樂闋神返幽元降福冥冥百順無愆於皇孝
思于萬斯年

世祖本紀至元二十年十月乙未享於太廟 二十一
年十月丁未享於太廟 二十二年十月庚子享於太
廟 二十三年十月丁酉享於太廟 二十四年十月

甲子享於太廟 二十五年十月己未享於太廟

祭祀志二十五年冬享制送白馬一

世祖本紀三十年十月庚寅享於太廟

成宗本紀元貞元年冬十月癸卯有事於太廟中書省
臣言去歲世祖皇后裕宗祔廟以綾代玉冊今玉冊玉
寶成請納諸各室帝曰親享之禮祖宗未嘗行之其奉
冊以來朕躬祝之命獻官迎導入廟

大德元年十月丁酉有事于太廟十一月戊辰增太廟

牲用馬

祭祀志大德二年正月特祭太廟用馬一牛一羊鹿野豕天鵞各七餘品如舊爲特祭之始

成宗本紀大德三年十月戊申朔有事於太廟 四年十月癸酉朔有事於太廟 六年六月辛未享於太廟 八年十月辛卯有事於太廟 九年十月辛巳有事於太廟 十年十月丁未有事於太廟

武宗本紀至大二年正月辛卯皇太子諸王百官上尊

號乙未恭謝太廟

祭祀志爲親祀之始

禮樂志至大二年親享太廟皇帝入門奏順成之曲盥
洗升殿用至元中初獻升降肅成之曲亦曰順成之曲
出入小次奏昌寧之曲迎神用至元中來成之曲改曰
思成初獻攝太尉盥洗升殿奏肅寧之曲酌獻太祖室
仍用舊曲改名開成睿宗室仍用舊曲改名武成皇帝
飲福登歌奏釐成之曲文舞退武舞進仍用舊曲改名

肅寧亞終獻酌獻仍用舊曲改名肅寧徹豆曰豐寧之曲送神曰保成之曲皇帝出廟廷亦曰昌寧之曲

祭祀志至大四年翰林院移署舊尚書省有旨月祭中書平章完澤等言祭祀非小事太廟歲一祭執事諸臣受戒誓三日乃行事今此輕易非宜舊制翰林院御容春秋二祭不必增益制若曰可

武宗本紀至大二年十二月己卯親享太廟

禮樂志皇慶二年秋九月用登歌樂祀太上皇於真定

玉華宮自是歲用之

祭祀志神御殿命大司徒田忠良詣真定致祭依歲例給御香酒并犧牲祭物錢中統鈔一百定

仁宗本紀延祐三年十月壬申有事於太廟 四年十月甲午朔有事於太廟

祭祀志四年始用登歌樂行三獻禮

仁宗本紀延祐五年十月甲午有事於太廟

英宗本紀七年二月庚寅帝即位四月庚戌有事於太

廟告即位八月丙辰祔仁宗聖文欽孝皇帝莊懿慈聖
皇后於太廟特們德爾攝太尉奉玉冊行事十月丁未
時享太廟戊午詔太常院臣曰朕將以四時躬祀太室
宜與羣臣集議其禮此追遠報本之道毋以朕勞於對
越而有所損其悉遵典禮丙寅定恭謝太廟儀式己巳
罷玉華宮祀睿宗登歌樂十一月丙子朔帝御齋宮丁
丑恭謝太廟至仁宗太室即流涕左右感動辛巳以親
祀太廟禮成御大明殿受朝賀甲辰太常禮儀院擬進

時享太廟儀式

至治元年正月丙戌帝服袞冕享太廟以左丞相拜珠
亞獻知樞密院事科緯巴終獻詔羣臣曰一歲惟四祀
使人代之不能致如在之誠實所未安歲必親祀以終
朕身

祭祀志英宗至治元年正月丙戌始以四孟月時享親
祀太室禮成坐大次謂羣臣曰朕纘承祖宗丕緒夙夜
祇慄無以報稱歲惟四祀使人代之不能致如在之誠

實所未安自今以始歲必親祀以終朕身

拜珠傳至元十四年始建太廟於大都至是四十年
親饗之禮未暇講肄拜珠奏曰古云禮樂百年而後
興郊廟祭享此其時矣帝悅曰朕能行之預勅有司
以親享太室儀注禮節一遵典故毋擅增損冬十月
始有事於太廟二年春正月孟饗始備法駕設黃麾
大仗帝服通天冠絳紗袍出自崇天門拜住攝太尉
以從帝見羽衛文物之美顧拜住曰朕用卿言舉行

大禮亦卿所共喜也對曰陛下以帝王之道化成天下非獨臣之幸實四海蒼生所共慶也致齋大次行酌獻禮升降周旋儼若素習中外肅然明日還宮鼓吹交作萬姓聳觀百年廢典一旦復見有感泣者拜住率百僚稱賀于大明宮執事之臣賜金帛有差

觀承案以唐太宗之爲君而馬周疏中尚惜其後世無皇帝入廟之文其餘之可紀者幾何元英宗可謂有仁人孝子之心卓然不惑

於流俗者矣

親祀時享儀其目有八

一曰齋戒祀前七日皇帝散齋四日於別殿治事如故
不作樂停奏刑名事不行刑罰致齋三日惟專心祀事
其二日於大明殿一日於大次致齋前一日尚舍監設
御幄於大明殿西序東向致齋之日質明諸衛勒所部
屯列晝漏下一刻通事舍人引侍享執事文武四品以
上官俱公服詣別殿奉迎二刻侍中版奏請中嚴皇帝

服通天冠絳紗袍三刻侍中版奏外辦皇帝結佩出別
殿乘輿華蓋繖扇侍衛如常儀奉引至大明殿御幄東
向坐侍臣夾侍如常一刻頃侍中前跪奏言請降就齋
俛伏興皇帝降座入室侍享執事官各還所司宿衛者
如常凡應祀官受誓戒於中書省散齋四日致齋三日
光祿卿鑑取明水燧取火火以供爨水以實尊 二曰
陳設祀前三日尚舍監陳大次於西神門外道北南向
設小次於西階西東向設版位於西神門內橫街南東

向設飲福位於大室尊彝所稍東西向設黃道衾褥於
大次前至西神門至小次版位西階及殿門之外設御
洗位於御版位東稍北北向設亞終獻位於西神門內
御版位稍南東向以北為上疊洗在其東北設亞終獻
飲福位於御飲福位後稍南西向陳設寶黃羅案於西
階西隨地之宜設享官宮縣樂省牲位諸執事公卿御
史位並如常儀殿上下及各室設簋簋籩豆尊罍彝等
等器並如常儀 三曰車駕出宮祀前一日所司備法

駕鹵簿於崇天門外太僕卿率其屬備玉輅於大明門外千牛將軍執刀於輅前北向其日質明諸侍享執事官先詣太廟祀所諸侍臣直衛及導駕官於致齋殿前左右分班立通事舍人引侍中跪奏請中嚴俛伏興皇帝服通天冠絳紗袍少頃侍中版奏外辦皇帝出齋室即御座羣臣起居訖尚輦進與侍中奏請皇帝升輿皇帝升輿華蓋繖扇侍衛如常儀導駕官前導至大明門外侍中進當輿前跪奏請皇帝降輿升輅皇帝升輅太

僕執御導駕官分左右步導門下侍郎進當輅前跪奏
請車駕進發車駕動稱警蹕千牛將軍夾而趨至崇天
門外門下侍郎跪奏請車駕少駐勅衆官上馬侍中承
旨退稱曰制可門下侍郎退傳制稱衆官上馬贊者承
傳勅衆官上馬上馬訖門下侍郎奏請車右升侍中
前承制退稱曰制可千牛將軍升訖門下侍郎奏請車
駕進發車駕動稱警蹕符寶郎奉入寶輿殿中監部從
在黃鉞內教坊樂前引鼓吹振作將至太廟禮直官引

諸侍享執事官於廟門外左右立班奉迎駕至廟門回

輅南向將軍降立於輅左侍中於輅前奏稱侍中

臣請

皇帝降輅步入廟門皇帝降輅導駕官前導皇帝步入

廟門稍西侍中奏請皇帝升輿尚贊奉輿華蓋繖扇如

常儀皇帝乘輿至大次侍中奏請皇帝降輿入就大次

皇帝入就次簾降宿衛如式尚食進饌如儀禮儀使以

祝版奏御署訖奉出太廟令受之各奠於坵置各室祝

案上通事舍人承旨勅衆官各還齋次四曰省牲器

祀前一日未後三刻廩犧令丞大官令丞太祝以牲就位禮直官引太常卿光祿卿丞監祭禮等官就位禮直官請太常監祭禮由東神門北偏門入升自東階每位視滌祭器司尊彝舉冪曰潔俱畢降自東階由東神門北偏門出復位立定禮直官稍前曰請省牲引太常卿視牲退復位次引廩犧令出班巡牲一匝西向折身曰充諸太祝巡牲一匝上一員出班西向折身曰臚畢俱復位蒙古巫祝致詞訖禮直官稍前曰請詣省饌位

引太常卿光祿卿監祭監禮光祿丞大官令丞詣省饌
位東西相向立定以北為上禮直官引太常卿詣饌殿
內省饌視饌訖禮直官引太常卿還齋所次引廩犧令
丞諸太祝以次牽牲詣厨授大官令次引光祿卿丞監
祭監禮詣厨省鼎鑊視滌漑訖各還齋所大官令帥宰
人以鸞刀割牲祝史各取牲之毛血每位共實一豆以
肝洗於鬱鬯及取胙膾每位共實一豆置於各位饌室
內庖人烹牲 五曰晨裸祀日丑前五刻諸享陪位官

各服其服光祿卿良醞令大官令入實籩豆簋簠尊罍
各如常儀太樂令率工人二舞以次入奉禮郎贊者先
入就位禮直官引御史博士及執事者以次各入就位
並如常儀禮直官引司徒以下官升殿分香設酒如常
儀禮直官引太常官御史博士升殿視陳設就位復與
太廟令太祝宮闈令升殿太祝出帝主宮闈令出后主
訖御史及上升殿官於當陛近西北向立奉禮於殿
上贊奉神主訖奉禮曰再拜贊者承傳諸官及執事者

皆再拜各就位禮直官引亞終獻等官由南神門東偏門入就位立定禮直官贊有司謹具請行事協律郎俛伏興舉麾工鼓祝官縣樂作思成之曲以黃鐘為宮大呂為角太簇為徵應鐘為羽作文舞九成止樂奏既終通事舍人引侍中版奏請中嚴皇帝服袞冕坐少頃禮直官引博士博士引禮儀使對立於大次門外當門北向侍中奏外辦禮儀使跪奏請皇帝行禮俛伏興簾捲符寶郎奉寶陳於西陛之西黃羅案上皇帝出大次博

士禮儀使前導華蓋繖扇如儀大禮使後從至西神門外殿中監跪進鎮圭皇帝執圭華蓋繖扇停於門外近侍從入門協律郎跪俛伏興舉麾工鼓祝官縣順成之樂作至版位東向協律郎偃麾工戛敔樂止引禮官分左右侍立禮儀使前奏請再拜皇帝再拜奉禮曰衆官再拜贊者承傳凡在位者皆再拜禮儀使奏請皇帝詣盥洗位宮縣樂作至洗位樂止內侍跪取匱興沃水又內侍跪取盤興承水禮儀使奏請搢鎮圭皇帝搢圭盥

手訖內侍跪取巾於篚興以進悅手訖皇帝詣爵洗位
奉瓚官以瓚跪進皇帝受瓚內侍奉匱沃水又內侍跪
奉盤承水洗瓚訖內侍奉巾以進皇帝拭瓚訖內侍奠
盤匱又奠巾於篚奉瓚官跪受瓚禮儀使奏請執圭前
導皇帝升殿宮縣樂作至西階下樂止皇帝升自西階
登歌樂作禮儀使前導皇帝詣太祖室尊彝所東向立
樂止奉瓚官以瓚蒞壺司尊者舉冪侍中跪酌鬱鬯訖
禮儀使前導入詣太祖神座前北向立禮儀使奉請搢

鎮圭跪奉璫官西向立以璫跪進禮儀使奏請執璫以
鬯裸地皇帝執璫以鬯裸地以璫授奉璫官禮儀使奏
請執鎮圭俛伏興皇帝俛伏興禮儀使前導出戶外禱
位禮儀使奏請再拜皇帝再拜訖禮儀使前導詣第二
室以下裸鬯並如上儀裸訖禮儀使奏請還版位登歌
樂作皇帝降自西階樂止宮縣樂作至版位東向立樂
止禮儀使奏請還小次前導皇帝行宮縣樂作將至小
次禮儀使奏請釋鎮圭殿中監跪受皇帝入小次簾降

樂止 六曰進饌皇帝裸將畢光祿卿詣饌殿視饌復位大官令率齋郎詣饌幕以牲體設於盤各對舉以行自南神門入司徒出迎饌宮縣樂作奏無射宮嘉成之曲禮直官引司徒齋郎奉饌升自泰階由正門入諸太祝迎於階上各跪奠於神座前齋郎執笏俛伏興徧奠訖樂止禮直官引司徒大官令率齋郎降自東階各復位饌之升殿也大官丞率七祀齋郎奉饌以序跪奠于七祀神座前退從殿上齋郎以次復位諸大官令率割

牲官詣各室進割牲體置俎上皆退 七曰酌獻禮直

官於殿上贊太祝立茅苴禮儀使奏請詣盥洗位簾捲
出次宮縣樂作殿中監跪進鎮圭皇帝執鎮圭至盥洗
位樂止北向立禮儀使奏請搢鎮圭執事者跪取匱興
沃水又跪取盤承水禮儀使奏請皇帝盥手執事者跪
取巾於篚興進悅手訖禮儀使奏請執鎮圭請詣爵洗
位北向立禮儀使奏請搢鎮圭奉爵官以爵跪進皇帝
受爵執事者奉匱沃水奉盤承水皇帝洗爵訖執事者

奉巾跪進皇帝拭爵執事者奠盤匱又奠巾於篚奉爵
官受爵禮儀使奏請執鎮圭升殿宮縣樂作至西階下
樂止升自西階登歌樂作禮儀使前導詣太祖室尊彝
所東向立樂止禮儀使奏請搢鎮圭執爵奉爵官以爵
跪進皇帝受爵司尊者舉罍良醞令跪酌犧尊之泛齊
以爵授執事者禮儀使奏請執鎮圭皇帝執圭入詣太
祖神位前北向立宮縣樂作奏開成之曲禮儀使跪奏
請搢鎮圭跪又奏請三上香三上香訖奉爵官以爵授

進酒官進酒官東向以爵跪進禮儀使奏請執爵三祭
酒於茅苴以虛爵授進酒官進酒官以授奉爵官奉爵
官退立尊彝所進酒官進取神案前所奠玉爵馬湏東
向跪進禮儀使奏請執爵祭馬湏祭訖以虛爵授進酒
官進奠神案上退禮儀使奏請執圭俛伏興司徒搢笏
跪於俎前奉牲西向以進禮儀使奏請搢鎮圭皇帝搢
圭俯受牲盤北向跪奠神案上蒙古祝史致辭訖禮儀
使奏請執鎮圭興前導出戶外褥位北向立樂止舉祝

官搢笏跪對舉祝版讀祝官北向跪讀祝文訖俛伏興
舉祝官奠祝版訖先詣次室禮儀使奏請再拜拜訖禮
儀使前導詣各室各奏本室之樂其酌獻進牲祭馬湏
並如第一室之儀既畢禮儀使奏請詣飲福位登歌樂
作至位西向立樂止登歌釐成之樂作禮直官引司徒
立於飲福位側太祝以爵酌上尊飲福酒合置一爵以
奉侍中侍中受爵奉以立禮儀使奏請皇帝再拜拜訖
奏請搢鎮圭跪侍中東向以爵跪進禮儀使奏請執爵

三祭酒又奏請啐酒訖以爵授侍中禮儀使奏請受胙
太祝以黍稷飯籩授司徒司徒東向跪進皇帝受以授
左右太祝又以胙肉俎跪授司徒司徒跪進皇帝受以
授左右禮直官引司徒退立侍中再以爵酒跪進禮儀
使請皇帝受爵飲福飲福訖侍中受虛爵興授太祝禮
儀使奏請執鎮圭俛伏興又奏請再拜拜訖樂止禮儀
使前導還版位登歌樂作降自西階樂止宮縣樂作至
位樂止禮儀使奏請還小次宮縣樂作將至小次禮儀

使奏請釋鎮圭殿中監跪受入小次簾降樂止文舞退
武舞進先是皇帝酌獻訖將至小次禮直官引亞獻官
詣盥洗位盥洗訖升自阼階酌獻並如常儀酌獻訖禮
直官引亞獻官詣東序西向立諸太祝各以酌罍福酒
合置一爵太祝捧爵進亞獻之左北向立亞獻再拜受
爵跪祭酒遂啐飲太祝進受爵退復于坫上亞獻興再
拜禮直官引亞獻官降復位終獻如亞獻之儀初終獻
既升禮直官引七祀獻官各詣盥洗位搢笏盥帨訖執

笏詣神位搢笏跪執爵三祭酒奠爵執笏俛伏興再拜
訖詣次位如上儀終獻畢贊者唱太祝徹籩豆諸太祝
進徹籩豆登歌豐成之樂作卒徹樂止奉禮曰賜胙贊
者唱衆官再拜在位者皆再拜禮儀使奏請詣版位簾
捲出次殿中監跪進鎮圭皇帝執圭行宮縣樂作至位
樂止送神保成之樂作一成止禮儀使奏請皇帝再拜
贊者承傳凡在位者皆再拜禮儀使前奏禮畢前導皇
帝還大次宮縣昌寧之樂作出門樂止禮儀使奏請釋

鎮圭殿中監跪受華蓋繖扇引導如常儀入大次簾降
禮直官引太常卿御史太廟令太祝宮闈令升殿納神
主降就拜位奉禮贊升納神主訖再拜御史以下諸執
事者皆再拜以次出禮直官各引享官以次出大樂令
率工人二舞以次出太廟令闔戶以降乃退祝冊藏於
匱 八曰車駕還宮皇帝既還大次侍中奏請解嚴皇
帝釋袞冕停大次五刻頃尚食進饌所司備法駕鹵簿
與侍祠官序立於太廟櫺星門外以北為上侍中版奏

請中嚴皇帝改服通天冠絳紗袍少頃侍中版奏皇帝
出次升輿導駕官前導華蓋繖扇如儀至廟門外太僕
卿率其屬進金輅如式侍中前奏請皇帝降輿升輅升
輅訖太僕卿門下侍郎奏請車駕進發俛伏興退車駕
動稱警蹕至櫺星門外門下侍郎奏請車駕權停勅衆
官上馬侍中承旨退稱曰制可門下侍郎退傳制贊者
承傳衆官上馬畢門下侍郎奏請勅車右升侍中承旨
退稱制可千牛將軍升訖導駕官分左右前導門下侍

郎奏請車駕進發車駕動稱警蹕符寶郎奉入寶輿殿
中監從教坊樂鼓吹振作駕至崇天門外垣櫺星門外
門下侍郎奏請車駕權停勅衆官下馬贊承傳衆官下
馬車駕動衆官前引入內石橋與儀仗倒捲而北駐立
駕入崇天門至大明門外降輅升輿以入駕既入通事
舍人承旨勅衆官皆退宿衛官率衛士宿衛如式

英宗本紀至治元年四月庚戌享太廟 十二月戊申
躬謝太廟 二年正月丁丑親祀太廟 十月戊辰享

太廟

祭祀志至治二年正月丁丑始陳鹵簿親享太廟二月二十三日以新作廟正殿夏秋二祭權止秋八月丙辰太皇太后崩太常院官奏國哀以日易月旬有二日外乃舉祀事有司以十月戊辰有事於太廟取聖裁制曰太廟禮不可廢迎香去樂可也又言太廟興工未畢有妨陳宮縣請止用登歌從之

英宗本紀至治三年正月乙未享太廟壬寅命太僕寺

增給牝馬百匹供世祖仁宗御容殿祭祀馬湏

泰定帝本紀至治三年十二月太常院臣言世祖以來太廟歲惟一享先帝始復古制一歲四祭請裁擇之帝曰祭祀大事也朕何敢簡其禮命仍四祭

二年十月丁亥享太廟

祭祀志祖宗御容至治三年遷置普慶寺祀禮廢泰定二年八月中書省臣言當祭如故乃命承旨韓齊齋香酒至大都同省臣祭於寺

泰定帝本紀三年二月甲申祭太祖太宗睿宗御容於翰林國史院 十月庚辰享太廟 四年二月甲戌祭太祖太宗睿宗御容於大承華普慶寺以翰林院官執事七月丙午享太廟

致和元年正月甲戌享太廟乙亥御史鄒惟亨言時享太廟三獻官舊皆勳戚大臣而近以戶部尚書爲亞獻人既疏遠禮難嚴肅請仍舊制以省臺樞密宿衛重臣爲之六月丙午遣使祀世祖神御殿 明宗即位遣中

書平章政事哈八兒禿同翰林國史院官致祭太祖太宗睿宗三朝御容

太宗本紀天歷元年禮官言時享之禮請改用仲月從之十一月癸亥帝宿齋宮甲子服袞冕享於太廟丁丑以躬祀太廟禮成御大明殿受諸王文武百官朝賀十二月丙午幸大崇恩福元寺謁武宗神御殿

二年正月甲子時享於太廟 二月丙申命中書省翰林國史院官祀太祖太宗睿宗御容於普慶寺四月己

丑時享於太廟五月幸大聖壽萬安寺作佛事於世祖
神御殿又於玉德殿及大天源延聖寺作佛事十月甲
申朔帝服袞冕享太廟十一月后八不沙請爲明宗資
冥福命帝師率羣僧作佛事七日於大天源延聖寺道
士建醮於玉虛天寶太乙萬壽四宮及武當龍虎二山
十二月甲辰以明年正月武宗忌辰命高麗漢僧三百
四十人預誦佛經二藏於大崇恩福元寺

至順元年正月辛酉時享太廟二月戊申命中書省及

翰林國史院官祭太祖太宗睿宗三朝御容四月甲申
時享太廟十月己未遣亞獻官中書右丞相雅克特穆爾
終獻官特穆爾布哈率諸事告廟請以太祖皇帝配享
南郊 二年正月乙酉時享太廟二月祀太祖太宗睿
宗御容四月乙卯時享太廟五月甲辰宣政院臣言舊
制列聖神御殿及諸寺所作佛事每歲計二百十六今
汰其十六爲定式制可十月己酉時享於太廟

至順三年正月己卯時享太廟八月丁未有事於太廟

禮樂志武宗至大以後親祀攝樂章

太常集禮云孔思建本所錄

皇帝入門奏順成之曲

別本親祀禘祫樂章詞律同

皇帝盥洗奏順成之曲

至元四年名肅寧之曲辭律同

皇帝升殿登歌樂奏順成之曲

別本親祀樂章詞律同

皇帝出入小次奏昌寧之曲

太常集禮云此金曲思逮取之詳見制樂始末

無射宮

於皇神宮象天清明肅肅來止相惟公卿

威儀孔彰君子攸寧神之休之綏成思成

迎神奏思成之曲

至元四年名來成之曲詞律同

黃鐘宮三成 齋

明盛服翼翼靈眷禮備多儀樂成九變烝烝孝心若
聞且見肝嚮端臨來寧來燕

大呂角二成

太簇徵二成

應鐘羽二成

詞並同上

初獻盥洗奏肅成之曲

別本親祀樂章名順成之曲詞律同

初獻升殿

降同

登歌樂奏肅寧之曲

至元四年名肅成之曲詞律同

司徒捧俎奏嘉成之曲

至元四年曲名詞律同

太祖第一室奏開成之曲

至元四年名武成之曲詞同

睿宗第二室奏武成之曲

至元四年名明成之曲詞同

世祖第三室奏混成之曲無射宮 於昭皇祖體健
乘乾龍飛應運盛德光前神功者定澤被垓埏詒厥
孫謀何千萬年

裕宗第四室奏昭成之曲無射宮 天啟深仁須世
而昌追惟顯考敢後光揚徽儀肇舉禮備音鏘皇靈
監止降釐無疆

順宗第六室奏慶成之曲無射宮 龍潛於淵德昭
於天承休基命光被絃埏洋洋如臨籩豆牲牷惟明

惟馨皇祚綿延

成宗第七室奏守成之曲無射宮

天開神聖繼世

清寧澤深仁溥樂協韶英宗枝嘉會氣和惟馨繁禧
來格永被皇靈

武宗第八室奏威成之曲無射宮

紹天鴻業繼世

隆平惠孚中國威靖邊庭厥功惟茂清廟安靈歆茲
明祀福祿來成

仁宗第九室奏歆成之曲無射宮

紹隆前緒運啟

文明深仁及物至孝躬行惟皇建極盛德難名居歆
萬祀福祿崇成

英宗第十室奏獻成之曲無射宮 神聖繼作式是

憲章誕興禮樂躬事烝嘗翼翼清廟燧有耿光于千
萬年世仰明良

皇帝飲福登歌奏釐成之曲夾鐘宮 穆穆天子禋

祀太宮禮成樂備敬徹誠通神胥樂止錫之醇醲天
子萬世福祿無窮

文舞退武舞進奏肅成

孔本作肅寧

之曲

至元四年名和成之曲詞律同

亞終獻行禮宮縣奏肅成之曲

至元四年名順成之曲詞律同

徹籩豆登歌樂奏豐寧之曲

至元四年名豐成之曲詞律同

送神奏保成之曲

至元四年名來成之曲詞律同

皇帝出廟廷奏昌寧之曲無射宮

緝熙惟清吉蠲

致誠上儀具舉明德薦馨已事而竣歡通三靈先祖

是皇來燕來寧

文宗天歷三年明宗祔廟酌獻奏永成之曲無射宮

猗那皇明世繼神武敬天弗違時潛時旅龍旂在
塗言受率土不遐有臨永錫多嘏

順帝本紀元統二年罷夏季時享七月辛卯祭太祖太
宗睿宗三朝御容罷秋季時享十月戊午享於太廟

至元元年七月丁亥享於太廟 二年十月己卯享於
太廟 三年十二月己巳享於太廟 四年十月辛卯
享於太廟

至元六年四月己丑享於太廟五月丙子車駕時巡上

都置月祭各影堂香于大明殿遇行禮時令省臣就殿迎香祭之七月戊午享於太廟

祭祀志至元六年六月監察御史呈嘗聞五行傳曰簡宗廟廢祭祀則水不潤下近年雨澤愆期四方多旱而歲減祀事變更成憲原其所致恐有感召古者宗廟四時之祭皆天子親享莫敢使有司攝也蓋天子之職莫大於禮禮莫大於孝孝莫大於祭世祖皇帝自新都城首建太廟可謂知所本矣春秋之法國君即位逾年改

元必行告廟之禮伏自陛下即位以來于今七年未嘗躬詣太廟似為闕典方今政化更新並遵舊制告廟之典理宜親享時帝在上都臺臣以聞奉旨若曰俟到大都親自祭也九月二十七日中書省奏以十月初四日皇帝親祀太廟制曰可前期告示以太師右丞相滿濟勒台爲亞獻官樞密知院阿魯圖爲終獻官知院普爾普翰林承旨婁章爲助奠官大司農阿雅噶齊爲七祀獻官侍中二人門下侍郎一人大禮使一人執劈正斧一人

禮儀使四人餘名如故事有司具儀注云享前一日質明所司備法駕於崇天門外侍儀官引擎執同導駕官具公服于致齋殿前左右分班侍立承奉舍人引門下侍郎侍中入殿門下侍郎相向立侍中跪奏臣某等官請皇帝中嚴就拜興退出少頃引侍中版奏外辦就拜興退皇帝出齋室侍中跪奏請皇帝升輿巡輦路由正門至大明殿西陛下侍中跪奏請皇帝降輿升殿就拜興引皇帝即御座執事官于午陛下起居訖舍人引侍

中門下侍郎入殿至御榻前門下侍郎相向立侍中跪
奏請皇帝降殿升輿就拜興導至大明殿外侍中跪奏
請皇帝升輿就拜興至大明門外太僕卿進御馬侍中
跪奏請皇帝降輿乘馬訖門下侍郎跪奏請車駕進發
就拜興進發時稱警蹕至崇天門外門下侍郎跪奏請
車駕少駐勅衆官上馬就拜興侍中承旨退稱曰制可
贊者承傳勅衆官上馬少頃門下侍郎跪奏請車駕進
發就拜興進發時稱警蹕導至太廟外紅門內門下侍

即跪奏請車駕權停勅衆官下馬就拜興贊者承傳勅
衆官下馬門下侍郎跪奏請車駕進發至石橋南侍中
跪奏請皇帝下馬步入神門就拜興皇帝下馬侍儀官
同導駕官前導皇帝步入神門稍西侍中跪奏請皇帝
升輿就拜興至大次殿門前侍中跪奏請皇帝降輿入
就大次就拜興簾降宿衛如式侍中入跪奏勅衆官還
齋次承旨贊者承傳勅衆官各還齋次俟行禮時至丑
時二刻頃侍儀官備擎執同導駕官于大次殿門前舍

人引侍中門下侍郎入大次座前侍中跪奏請皇帝中
嚴服袞冕就拜興退少頃再引侍中跪奏外辦就拜興
退禮儀使跪奏請皇帝行禮侍儀官同導駕官導引皇
帝至西神門擎執侍儀官同導駕官止行禮畢皇帝由
西神門出侍儀官備擎執同導駕官引導皇帝還至大
次舍人引侍中入跪奏請皇帝解嚴釋冕服尚食進膳
如式畢侍中跪版奏外辦就拜興退導皇帝出大次侍
中跪奏請皇帝升輿就拜興侍儀官同導駕官前導至

神門外太僕卿進御馬侍中跪奏請皇帝降輿乘馬就
拜輿乘馬訖門下侍郎跪奏請車駕進發就拜輿退進
發時稱警蹕至櫺星門外門下侍郎跪奏請車駕少駐
勅衆官上馬就拜輿侍中承旨退稱曰制可贊者承傳
勅衆官上馬少頃門下侍郎跪奏請車駕進發就拜輿
進發時稱警蹕教坊樂振作至麗正門裏石橋北引門
下侍郎跪奏請車駕權停勅衆官下馬就拜輿贊者承
傳勅衆官下馬門下侍郎跪奏請車駕進發侍儀官引

擎執同導駕官前導執事官後從皇帝由紅門裏輦路至大明門外侍中跪請皇帝降馬乘輿就拜興侍儀官擎執同導駕官導至大明殿諸執事殿下相向立俟皇帝入殿升座侍中跪奏勅衆官皆退贊者承傳勅衆官皆退

順帝本紀至正元年正月丁巳享於太廟四月甲申享於太廟七月己卯享於太廟十月丁未享於太廟二年正月丁丑享於太廟四月乙巳享於太廟七月辛未

享於太廟十月丁未享於太廟 三年正月丁丑享於
太廟四月乙巳享於太廟七月丁卯享於太廟十一月
辛未享於太廟 四年正月辛未享於太廟七月己丑
享於太廟

李黼傳黼遷禮部主事拜監察御史首言禴祀烝嘗
古今大祭今太廟惟二祭而日享佛祠神御非禮也
宜據經行之

王圻續通考時方永貞請真定玉華宮罷遣太常禮

樂議曰原廟之制隆古未聞漢孝惠從叔孫通之請
始詔有司立原廟遂有衣冠月出遊之名其後郡國
所在因各立廟至元帝永平四年貢禹奏郡國祖宗
廟不應古禮天子是其議罷之謹案尚書黷于祭祀
時謂弗欽春秋之義父不祭於支庶君不祭於臣僕
之家伏覩聖朝建立七廟崇奉孝享可謂至矣而睿
宗皇帝神御別在真定路玉華宮竊惟有功德於天
下者莫如太祖皇帝世祖皇帝太祖皇帝不聞有原

廟世祖皇帝神御奉安大聖壽萬安寺歲時差官以
家人禮祭供不用太常禮樂今玉華宮原廟列在郡
國又非龍興降誕之地主者以臣僕之賤供奉御容
非禮之甚伏望朝廷稽前漢故事致隆太廟玉華宮
照依京師諸寺影堂例止命有司以時祭供罷遣太
常禮樂非獨聖朝得典禮之正而在天之靈無褻瀆
之煩禮官免失禮之責矣

至正六年四月乙卯享於太廟七月己卯享於太廟

七年正月己酉享於太廟十月辛未享於太廟 八年

正月丁未享於太廟 九年正月丁酉享於太廟四月

丁卯享於太廟十月辛卯享於太廟 十一年正月乙

卯享於太廟四月乙酉享於太廟十月己卯享於太廟

十二年四月己酉時享太廟七月丁丑時享太廟十

月丁未時享太廟 十三年正月癸酉享於太廟四月

乙巳時享太廟七月丁卯時享太廟九月丁酉享於太

廟 十四年正月辛未享於太廟十月甲午享於太廟

十五年正月癸亥享於太廟三月甲午命汪家奴攝太尉持節授皇太子阿雅實爾達臘玉冊錫以冕服九旒祇謁太廟七月辛卯享於太廟九月辛卯命秘書卿達蘭提調別古太后影堂祭祀知樞密院事額森特穆爾提調世祖影堂祭祀宣政院使蠻子提調裕宗英宗影堂祭祀十月丙子以郊祀命皇太子阿雅實爾達臘祭告太廟

十六年正月戊子親享太廟

元史紀事本末張氏溥曰作史者曰元之五禮唯祭祀稍近古而郊廟親享文嘗不備至大德九年乃定親享太廟則自至大二年始改號幾十年而典祀方舉則其荒于禮也久矣

蕙田案元祀禮煩瀆大率沿宋之弊然未造時享較宋加勤矣

右元廟享

五禮通考卷九十五

欽定四庫全書

五禮通考卷九十六

刑部尚書秦蕙田撰

吉禮九十六

宗廟時享

明史太祖本紀洪武元年二月壬寅定宗廟禮歲必親祀以為常

禮志洪武元年定宗廟之祭每歲四孟及歲除凡五享

學士陶安等言古者四時之祭三祭皆合享於祖廟惟春祭于各廟自漢而下廟皆同堂異室則四時皆合祭今宜倣近制合祭於第一廟庶適禮之中無煩瀆也太祖命孟春特祭于各廟三時及歲除則祫祭于德祖廟太祖本紀洪武元年夏四月丁未祫享太廟

蕙田案此時享祫也

洪武二年春正月丁未享太廟

明會典洪武二年定時享之制春以清明夏以端午秋

以中元冬以冬至歲除如舊

明史禮志二年詔太廟祝文止稱孝子皇帝不稱臣凡
遣皇太子行禮止稱命長子某勿稱皇太子後稱孝元
孫皇帝又改稱孝曾孫嗣皇帝初太廟每室用幣一二
年從禮部議用二白繒又從尚書崔亮奏作圭瓚

三年禮部尚書崔亮言孟月者四時之首因時變致孝思故
備三牲黍稷品物以祭至仲季之月不過薦新而已既行郊祀
則廟享難舉宜改從舊制其清明等節各備時物以薦從之

春明夢餘錄洪武三年禮臣崔亮奏周禮大宗伯以吉
禮事邦國之鬼神以肆獻裸享先王灌以鬱鬯謂始迎
尸求神時也禮記郊特牲曰魂氣升於天體魄歸於地
故祭有求諸陰陽之義殷人先求諸陰聲是也祭統云
祭之屬莫重於灌凡大祭有三始宗廟以樂為致神始
以裸為歆神始以腥為陳饌始案說文裸祭也從示果
聲酌鬯以灌地夏氏曰灌者謂以圭瓚酌爵以獻尸尸
受酒而不飲因灌於地故謂之灌也鬯說文曰鬯以秬

釀鬱金草芬芳攸服以降神也徐氏曰秬黑黍也服服事也周人尚臭裸用鬱金鬯以秬黍搗鬱金草取汁而用之和釀其氣芬香調鬯故謂之秬鬯陸佃云秬者百穀之華鬯者百草之英故先王煮以合鬯圭瓚禮書云圭柄也瓚杓也徐氏曰瓚亦圭也圭狀剡上邪銳之於其首爲杓形謂之瓚於其柄爲注水道所以灌瓚之言進也以進於神今定擬宗廟之祭奠帛之前宜舉用裸禮所用圭瓚宜依周禮以玉爲之瓚口徑四寸深至二

寸圭通長一尺二寸博二寸五分厚五分鼻一寸作龍形流空五分瓚盤用金為之口徑九寸深五分足徑七寸高九分其鬱鬯用糯米代黑黍為酒以鬱金汁和之是年之冬享廟行家人禮次年始行灌禮

明會典洪武四年罷廟庭幃設之次改設黃布幃殿於廟內併具兩廡中居祖考神位廡立親王及功臣每奠獻祖考則遣大臣各分獻不讀祝

明史禮志九年新建太廟凡時享正殿中設德祖帝后

神座南向左懿祖右熙祖東西向仁祖次懿祖凡神座俱不奉神主止設衣冠禮畢藏之孟春擇上旬日三孟用朔日及歲除皆合自是五享皆罷特祭而行合配之禮

二十一年定時享儀更前制迎神四拜飲福四拜禮畢四拜

二十五年定時享若國有喪事樂備而不作

明會典時享洪武二十六年初定儀一齋戒前一日太

常司官宿於本司次日具本奏致齋三日次日進銅人
一省牲牛九羊八山羊十豕十九鹿一兔四正祭前二
日太常司官奏明日與光祿司官省牲至次日省牲畢
同復命一陳設皇高祖前犢一羊一豕一登二鉶二簋
豆各十二簠簋各二帛二白色奉先制帛皇曾祖陳設
同皇祖陳設同皇考陳設同共設酒罇三金爵八瓷爵
十六篚四於殿東祝文案一於殿西親王配享四壇共
二十一位第一壇壽春王妃劉氏犢一羊一豕一登二

釧二籩豆各十簋簋各二爵六帛二展親制帛第二壇
霍丘王妃翟氏下蔡王安豐王妃趙氏南昌王犢一羊
一豕一登六釧六籩豆各十簋簋各二爵十八帛六展
親制帛第三壇蒙城王妃田氏盱眙王妃唐氏臨淮王
妃劉氏陳設與二壇同第四壇寶應王六安王來安王
都梁王英山王山陽王招信王犢一羊一豕一登七釧
七籩豆各十簋簋各二爵二十一帛七展親制帛共設
酒罇三篚四於殿東南北向功臣配享十壇中山武寧

王徐達開平忠武王常遇春岐陽武靖王李文忠寧河
武順王鄧愈東甌襄武王湯和黔寧昭靖王沐英虢國
忠烈公俞通海蔡國忠毅公張德勝越國武莊公胡大
海梁國武桓公趙德勝泗國武莊公耿再成永義侯桑
世傑河間忠武王張玉一正祭典儀唱樂舞生就位執
事官各司其事導引官導引皇帝至御拜位內贊奏就
位典儀唱迎神奏樂樂止內贊奏四拜百官同典儀唱
奠帛行初獻禮奏樂執事官各捧帛金爵受酒獻於神

御前讀祝官取祝跪於神御右內贊奏跪典儀唱讀祝
讀訖奉安於神御前內贊奏俛伏興平身百官同樂止
典儀唱行亞獻禮執事官各以瓷爵受酒獻於神御前
樂止典儀唱行終獻禮儀同亞獻樂止太常司卿進立
殿東西向唱賜福胙光祿司官捧福酒胙自神御前中
門左出至皇帝前內贊奏跪搢圭光祿司官以福酒跪
進內贊奏飲福酒光祿司官以胙跪進內贊奏受胙出
圭俛伏興平身內贊奏四拜百官同典儀唱徹饌奏樂

執事官徹饌樂止太常卿詣神御前跪奏禮畢請還宮
奏樂內贊奏四拜百官同樂止典儀唱讀祝官奉祝進
帛官捧帛各詣燎位奏樂內贊奏禮畢

明史恭閔帝本紀洪武二十五年閏五月詔行三年喪
郊社宗廟如常儀

樂志洪武元年宗廟樂章

迎神太和之曲 慶源發祥世德惟崇致我眇躬開
基建功京都之中親廟在東惟我子孫永懷祖風氣

體則同呼吸相通來格來崇皇靈顯融

奉冊寶

時享不用

維水有源維木有根先世積善福垂

後昆冊寶鏤玉德顯名尊祇奉禮文仰答洪恩

進俎

時享不用

明明祖考安神清廟薦以牲牷匪云盡

孝願通神明願成治效此帝王之道亦祖考之教

初獻壽和之曲 德祖廟初獻云思皇高祖穆然深

元其遠歷年其神在天尊臨太室餘慶綿綿歆于几

筵有永其傳 懿祖廟初獻云思皇曾祖清勤純古

田里韜光天篤其祐佑我曾孫弘開土宇追遠竭虔
勉遵前矩 熙祖廟初獻云維我皇祖淑後貽謀盛
德靈長與泗同流發于孫枝明禋載修嘉潤如海恩
何以酬 仁祖廟初獻云惟我皇考既淳且仁弗耀
其身克開嗣人子有天下尊歸于親景運維新則有
其因

亞獻豫和之曲 對越至親儼然如生其氣昭明感
格在庭如見其形如聞其聲愛而敬之發乎中情

終獻熙和之曲 承先人之德化家爲國母曰予小子基命成績欲報其德昊天罔極慙懃三獻我心悅懌

徹豆雍和之曲 樂奏具肅神其燕嬉告于成祖亦右皇妣敬徹不遲以終祀禮祥光煥揚錫以嘉祉送神安和之曲 顯兮幽兮神運無迹鸞馭逍遙安其所適其靈在天其主在室子子孫孫孝思無斁二十一年更定其初獻合奏餘並同

思皇先祖耀靈于天源衍慶流由高逮元元孫受命
追遠其先明禋世崇億萬斯年

永樂以後改迎神章致我眇躬句爲助我祖宗又改終
獻章首四句爲惟前人之功肇膺天歷延及予小子
爰受方國餘並同

成祖本紀永樂元年春正月乙酉享太廟
七年夏四月癸酉朔皇太子攝享太廟

仁宗本紀洪熙元年春正月己卯享太廟

英宗前紀正統元年夏四月丁酉朔享太廟

禮志正統三年正月享太廟禮部言故事先三日太常寺奏祭祀御正殿受奏是日宣宗皇帝忌辰例不鳴鐘鼓第視事西角門帝以祭祀重事仍宜升殿餘悉遵永樂間例行之

英宗後紀天順二年正月乙丑享太廟

六年閣臣以皇太后喪請改孟冬時享于除服後從之
憲宗本紀成化元年春正月乙卯享太廟

禮志成化四年禮部以慈懿太后喪請改孟秋享廟于
初七日不從

孝宗本紀弘治元年春正月乙亥享太廟
十六年春正月癸酉遣官代享太廟

武宗本紀正德元年春正月乙酉享太廟
世宗本紀嘉靖元年春正月癸丑享太廟

明會典凡太廟和羹嘉靖三年奏准依福胙脯醢豚肺
例另用一牛不許牲上取辦其牲體分爲六塊一首一

背四肢不許零碎

明史禮志嘉靖九年春世宗行特享禮令于殿內設幃幄如九廟列聖皆南向各奠獻讀祝三餘如舊

十年正月帝詣太廟行特享禮

通鑑紀事十年春正月乙未特享太廟正太祖南面位初太祖立四親廟德懿熙仁同宮異廟各南向孟春特享于羣廟三時合祭于德祖廟序用昭穆後改建太廟同堂異室亦各南向四孟及歲除俱各祭于中室仍序

昭穆如初罷特享禮至英宗升祔九室悉備憲宗將祔用禮官議祧懿祖孝宗祔祧熙祖武宗祔祧仁祖獨德祖不祧時享則太祖太宗以下俱東西向至是帝諭張孚敬曰朕欲自今春享奉太祖居中太宗而下各居一室行特享禮三時仍聚羣廟于太祖之室昭穆相向行時祫禮季冬中旬並享太廟親王功臣配食兩廡以存太祖當代之制歲暮節祭行于奉先殿世廟止行四時之享歲暮祭于崇先殿庶祭義明而萬世可行也邪論

勿惑即會李時議上或咨夏言以助之孚敬唯唯如諭
議聞帝從之乃命祠官于廟中設帟如九廟狀奉太祖
南向羣宗遞遷就室各南向特享之始退德祖于祧殿
不復預時享矣

明史禮志嘉靖十一年大學士張孚敬等言太廟祭祀
但設衣冠皇帝改行出主誠合古禮但徧詣羣廟躬自
啟納不免過勞今請太祖神主躬自安設羣廟帝后神
主則以命內外捧主諸臣帝從其請

明會典特饗儀一前期二日太常寺卿同光祿寺卿面奏省牲如常儀次日復命太常寺陳設如圖儀一正祭日上乘輿到廟街門入至靈星門西降輿導引官導上由靈星左門入上至戟門東帷幕具祭服出導引官導上由戟門左門入至寢殿同捧主官帝主以大臣恭捧后主以內臣恭捧出主陞太廟至太祖室安主次至太宗以下昭廟安主次仁宗以下穆廟安主訖典儀唱樂舞生就位執事官各司其事導引官導上至御拜位內

贊奏就位典儀唱迎神樂作樂止內贊奏四拜平身傳
贊百官同典儀唱奠帛行初獻禮樂作內贊導上至太
祖前奏跪奏搢圭奏上香司香官捧香跪於上左上三
上香訖執事官捧帛跪於上右奏獻帛上獻帛執事者
捧爵跪於上右奏獻爵上獻太祖前爵奏出圭上出圭
致恭訖奏搢圭捧爵者跪於上左奏獻爵上獻高后前
爵奏出圭奏詣讀祝位上至中室讀祝位樂暫止奏跪
傳贊衆官皆跪內贊贊讀祝讀官跪讀訖樂復作奏俛

伏興平身傳贊百官同內贊導上至太宗以下昭廟前
奏跪奏搢圭奏上香奏獻帛獻爵奏出圭內贊導上至
仁宗以下穆廟前奏跪奏搢圭奏上香獻帛獻爵奏出
圭奏詣讀祝位內贊導上至太宗前讀祝位奏跪傳贊
衆官皆跪樂暫止內贊贊讀祝七廟讀祝官跪齊讀訖
樂復作俯伏興平身傳贊百官同奏復位內贊導上復
位樂止典儀唱行亞獻禮樂作內贊導上至太祖前奏
搢圭奏獻爵上獻太祖高后前爵訖奏出圭奏復位太

宗仁宗以下捧主官獻爵訖樂止典儀唱行終獻禮樂作儀同亞獻樂止太常卿於殿左西向立唱賜福胙內贊奏跪奏搢圭光祿卿捧酒跪於上右奏飲福酒上飲訖光祿官捧胙跪於上右奏受胙上受訖奏出圭俯伏興平身奏四拜傳贊百官同典儀唱徹饌樂作樂止太常卿至中室向上跪奏禮畢請還宮樂作內贊奏四拜樂止典儀唱讀祝官捧祝進帛官捧帛各詣燎位上轉立拜位之東樂作捧祝帛官出殿門內贊奏禮畢上納

穆廟主次納昭廟主至太祖高后前納主訖率捧主官各捧至寢殿安訖易服還宮時祫儀一前一日太常寺陳設如圖儀一正祭日儀同前惟祝文總一讀各廟以下上香獻帛獻爵俱捧主官代行

明史樂志嘉靖十五年孟春九廟特享樂章

太祖廟迎神太和之曲於皇於皇今仰我聖祖乃武乃文攘夷正華為天下大君比隆于古越彼放勳肇造王業佑啟予子孫功德超邁大室攸尊首稱春

祀誠敬用申維神格思萬世如存

初獻壽和之曲 薦帛于篚潔牲于俎嘉我黍稷酌

我清酏愚孫罔祀奠獻初舉翼翼精誠對越我皇祖
居然顧歆永錫純祐

亞獻豫和之曲 籥舞既薦八音洋洋工歌喤喤醇
醴載羞齋明其將之永佑于子孫歲事其承之俾嗣
續克承百世其保之

終獻寧和之曲 三爵既崇禮秩有終盈溢孚顒顯

相肅雍惟皇祖格哉以繹以融申錫無窮暨于臣民
萬福攸同

徹饌豫和之曲 禮畢樂成神悅人宜籩豆靜嘉敬
徹不遲穆穆有容秩秩其儀益祇以嚴矧敢敷于斯
還宮安和之曲 於皇我祖陟降在天清廟翼翼裡
祀首虔明神既留寢祐靜淵介福綏祿錫蔭綿綿以
惠我家邦於萬斯年

成祖廟迎神太和之曲 於惟文皇重光是宣克勘

內難轉坤旋乾外讐百蠻威行八埏貽典則于子孫
不忘不愆聖德神功格于皇天作廟奕奕百世不遷
祀神孔明億萬斯年 初獻亞獻終獻徹饌還宮俱
與太祖廟同

仁祖廟迎神太和之曲 明明我祖盛德天成至治
訏謨適駿有聲專真致享惟古經是程春祀有嚴以
迓聖靈惟陟降在庭以賚我思成

初獻壽和之曲 幣牲在陳金石在縣清酒方獻百

執事有虔明神洋洋降歆自天俾我孝孫德音孔宣
亞獻豫和之曲 中誠方殷明神如存醴齊孔醇再
舉曩尊福祿穰穰攸介攸臻追遠報酬罔極之恩

終獻寧和之曲 樂比聲歌侑舞婆娑稱彼玉爵酒
旨且多獻享惟終神聽以和孝孫在位受福不那

徹饌雍和之曲 牲牲在俎稷黍在簋孝享多儀格
我皇祖稱歌進徹髦士膺膺孝孫受福以敷錫于下

土

還宮安和之曲 殖享孔明物備禮成於昭在天以
莫不聽神明即安維華寢是憑肇祀迄今百世祇承
宣廟英廟憲廟俱與仁廟同

孝廟迎神太和之曲 列祖垂統景運重熙於惟孝
皇敬德允持用光于大烈化彼烝黎專廟以享經禮
攸宜俎豆式陳庶幾來思

初獻壽和之曲 粢盛孔蠲腍肥牲牷考鼓齎齎萬
舞蹺蹺清醑初酌對越在天明神居歆式昭厥虔

亞獻豫和之曲

祀事孔勤精意未分樂感鳳儀禮

虔駿奔醢齊挹清載奠瑤尊神其格思福祿來臻

終獻寧和之曲

樂舞既成獻享維終明明對越彌

篤其恭篤恭維何明德是崇神之聽之萬福來同

徹饌雍和之曲

牲牢醴陳我享我將黍稷蘋藻潔

白馨香徹以告成降禧穰穰神錫無疆祐我萬方

還宮安和之曲

禮享既洽神御聿興廟寢煌煌以

憑以寧維神匪遐上下在庭於寢孔安永底我烝民

之生

武廟迎神 列祖垂統景運重熙於惟武皇昭德敕
威用翦除奸宄大業弗隳專廟以享經禮攸宜俎豆
式陳庶幾來思 初獻亞獻終獻及徹饌還宮俱與
孝廟同

睿廟迎神太和之曲 於穆神皇秉德凝道仁厚積
累配于穹昊流慶顯休萃于眇躬施于無窮以似以
續以光紹我皇宗惟茲氣始俎豆是供循厥舊典式

敬式崇神其至止以鑒愚衷

初獻壽和之曲 制帛牲牢庶羞芬膋玉戚朱干協

于韶簫清醑在筵中情纏綿神之格思儀形儼然

亞獻豫和之曲 瑤爵再陳侑以工歌籥舞蹌蹌八

音諧和孝思肫肫感格聖靈致慤則存如聞其聲

終獻寧和之曲 儀式弗踰奠爵維三樂舞雍容以

雅以南仰仁源德澤嶽崇海淵願啟我子孫緝熙光

明維兩儀是參

徹饌雍和之曲 嘉饌甘只亦既歆只登歌迅徹敬
終惟始維神孔昭賚永成于孝矣

還宮安和之曲 幽顯莫測神之無方祀事既成神
返諸帝鄉申發休祥蔭嗣蕃昌宜君兮宜王歷世無
疆

王圻續通考嘉靖十五年秋罷中元節內殿之祭著爲
令先是上諭禮部尚書夏言曰春清明秋霜降二節于
陵前祭甚合禮今中元亦有陵祭內殿其勿瀆可也言

對曰中元係是俗節事本不經陵祀既有遣官而內殿
又有祭祀事涉煩數上從之

明史禮志嘉靖十七年定享祫禮凡立春特享親祭太
祖遣大臣八人分獻諸帝內臣八人分獻諸后立夏時
祫各出主于太廟太祖南向成祖西向序七宗之上仁
宣英憲孝睿武宗東西相向秋冬時祫如夏禮

春明夢餘錄十七年九月上尊皇考廟睿宗祔饗太廟
睿宗于孝宗弟也躋武宗上遂稱太宗為成祖于時定

饗祫禮及其樂章凡立春時饗上親獻太廟遣大臣獻
列聖各出主成廟迎神樂別歌三獻徹饌還宮樂如太
廟仁宣英憲四廟樂歌同孝武二廟迎神樂別歌三獻
徹饌還宮歌同睿廟樂異于諸廟立夏時祫各出主于
太廟大殿行禮立秋時祫如夏禮樂歌異于夏立冬時
祫如秋禮迎神徹饌還宮樂歌異于秋季冬中旬大祫
出四祖太祖成祖七宗主于太廟歌大祫祭畢各歸主
于其寢是年皇后助獻罷脫舄禮

明史樂志九廟時祫樂章

孟夏迎神太和之曲 序屆夏首兮風氣薰禮嚴時
祫兮戛擊鐘鼓迎羣主來合享交欣於皇列聖正南
面以申崇報皇勲

初獻壽和之曲 瞻曙色方昕仰列聖在上奠金觥
而捧幣紋小孫執盈兮敢不懼慙

亞獻豫和之曲 思皇祖仰聖神來列主會太宸時
祫修循古倫惟聖鑒歆愚孫忱恂

終獻寧和之曲 齊醴清兮麥熟新
籩豆潔兮孝念

申仰祖功兮宗德願降祐兮後人

徹饌雍和之曲 樂終兮禮成告玉振兮訖金聲徹
之弗遲以肅精誠

還宮安和之曲 三獻就兮祖宗鑒享一誠露兮念
維長思弗盡兮思弗忘深荷德澤之啟祐小孫惟賴
以餘光神返宮永安保家國益昌

孟秋迎神 時兮孟秋火西流感時愍祀兮爽氣回

喜金風兮飄來仰祖宗兮永慕哉秋禋是舉兮希鑒
歆小孫恭迓兮捧素裁

初獻 皇祖降筵列聖靈聯執事恐踰樂舞踴躍小
孫捧盈兮敢弗虔

亞獻 再酌兮玉漿潔淨兮馨香祖宗垂享兮錫允
昌萬歲兮比禮行

終獻 進酒三觥歌舞雍喤鐘鼓轟錚皇祖列聖永
享愚誠

徹饌 秋嘗是舉稌黍豐農三獻既周聖靈顯容小
孫時思恩德兮惟愷

還宮 仰皇祖兮聖神功祀典陳兮報莫窮嘗禋告
竣鸞馭旋宮皇靈在天主在室萬禩陟降何有終

孟冬迎神 時兮孟冬凜以淒感時愍祀氣潛回邈
朔風兮北來仰祖宗兮永慕哉冬禋是舉兮希鑒歆
小孫恭迓兮捧素裁 初亞終獻俱同孟秋

徹饌 冬烝是舉俎豆維豐三獻既周聖靈顯容小

孫時思恩德兮惟愷

還宮

同孟秋惟改
嘗祫為燕祫

王圻續通考上以乾明門鷹隼田犬既經放縱其奉先
奉慈崇先祭品止依會典所載鹿兔雉鴈其鷄鵲等物
不必復用

春明夢餘錄新太廟成睿宗帝后遂祔饗然舊廟猶藏
主凡四孟歲除五饗饗太廟日仍設祭于睿宗廟

明會典嘉靖二十四年重建太廟成奉睿宗升祔而罷

睿宗廟祭時饗于正殿則太祖仍居中南向成祖而下
以序東西相向孟春仍于上旬擇日孟夏孟秋孟冬仍
用朔日俱合饗祫祭仍以歲除日凡儀節俱如舊

明史禮志二十四年新廟成復定享祫止設衣冠不出
主

隆慶元年孟夏時享以世宗几筵未撤遵正德元年例
先一日帝常服祭告几筵祇請諸廟享祀其後時享祫
祭在大祥內者皆如之

穆宗本紀隆慶元年夏四月丙戌朝享太廟

王圻續通考隆慶元年左給事中王治請正獻皇廟位不報夏四月朔舉時饗太廟禮是日陪祭官大學士李春芳安鄉伯張鉉吏部尚書楊博等不至詔免問時久廢親祀人多懈怠至是上新即位行之陪祀諸臣唯英國公張溶等二十七人先至其餘有陸續陪拜者有趨門外不及入班者有全未到者爲糾儀御史蔡應揚劾奏有旨姑從寬遂一無所問

神宗本紀萬曆三年春正月丁未享太廟

明會典嘉靖間稱六廟皇祖考妣太皇帝后皇伯考孝
宗敬皇帝皇伯妣孝康敬皇后皇考睿宗獻皇帝皇妣
慈孝獻皇后皇兄武宗毅皇帝孝靜毅皇后萬曆七年
以槩稱幾廟祖妣未明更定祝文通列九廟帝后聖號
續文獻通考太常寺卿溫純等請更定時饗疏稱太廟
時饗原設九帝后冠服今祝文內稱五廟皇祖考妣太
皇帝后照得憲廟而下既備列六帝后乃又加以五廟

則不止于九矣今查五廟內實止太祖成祖英宗三廟
設祭而祝文則多稱二廟于座位未合似應改正其歲
暮大禘東壁下配饗設壽春王以下共十五位神牌案
帝系圖壽春王于太祖爲伯霍丘以下七王爲兄寶應
以下七王爲姪自英宗以來相沿稱壽春及霍丘以下
七王俱爲皇高伯祖寶應以下七王爲皇曾伯祖倫序
既紊且世次已遠不宜仍稱高曾伯祖查親盡帝后止
稱徽號今諸王似應改稱本爵庶于名義爲協上命閣

臣議議得時饗之制止于九廟太祖成祖百世不遷其餘則以親序而祧廟不與焉查得先廟祝文弘治中自憲宗而上稱六廟太皇帝后嘉靖初自孝宗而上稱六廟皇祖考妣太皇帝后至孝烈皇后升祔仁宗奉祧始稱五廟隆慶間因而不改蓋其時世宗新升之主即孝烈舊祔之位世數猶未增也至我皇上嗣統則世次異矣方乃時饗祝文自高皇祖憲宗皇帝至皇考穆宗皇帝已備六廟之數而太祖成祖英宗三廟猶仍五廟之

稱揆之世數名義委屬未妥臣等竊惟孝莫大于尊祖
禮莫嚴于假廟當皇上躬親對越之頃正祖宗神靈陟
降之時帝后尊稱不宜徑從簡畧廟位世次尤當序立
分明合無比照歲暮大禋禮將時饗祝文通列九廟帝
后聖號以致如在之誠不必更稱五廟其大禋配饗壽
春等王親屬已遠稱謂未安宜將諸王神牌止稱本爵
其皇高伯祖等稱盡行裁去庶得情理之當合候命下
容臣等另撰祝文進呈御覽發下該寺并壽春等王神

牌一體遵照改正施行從之

明史神宗本紀萬曆十九年夏四月丙申享太廟是後廟祀皆遣代

熹宗本紀天啟元年春正月庚辰享太廟

莊烈帝本紀天啟七年八月即皇帝位冬十月甲午朔享太廟

崇禎十六年冬十月辛酉朔享太廟

禮志奉先殿洪武三年建每日朝晡帝及皇太子諸

王二次朝享皇后率嬪妃日進膳羞諸節致祭又錄
皇考妣忌日歲時享祀以爲常宣德元年奉太宗祔
廟畢復遣鄭王瞻埈詣奉先殿設酒果祭告奉安神
位天順七年奉孝恭皇后祔廟畢帝還行奉安神位
禮畧如祔廟儀弘治十七年吏部尚書馬文升言南
京進鮮船本爲奉先殿設輓夫至千人沿途悉索今
揚徐荒旱願倣古凶年殺禮之意減省以甦民困命
所司議行之嘉靖十四年定內殿之祭并禮儀清明

中元聖誕冬至正旦有祝文樂如宴樂兩宮壽旦皇
后并妃嬪生日皆有祭無祝文樂立春元宵四月八
日端陽中秋重陽十二月八日皆有祭用時食舊無
祝文今增告詞舊儀但一室一拜至中室跪祝畢又
四拜焚祝帛今就位四拜獻帛爵祝畢后妃助亞獻
執事終獻徹饌又四拜忌祭舊具服作樂今更淺色
衣去樂凡祭方澤朝日夕月出告回參及冊封告祭
朔望行禮皆在焉先是冊封告祭以太常寺官執事

仍題請遣官至萬厯元年帝親行禮而遣官之請廢
二年太常寺以內殿在禁地用內官供事便帝俞其
請凡聖節中元冬至歲暮嘉靖初俱告祭于奉先殿
十五年罷中元祭四十五年罷歲暮祭隆慶元年罷
聖節冬至祭其方澤朝日夕月出告回參嘉靖中行
于景神殿隆慶元年仍行于奉先殿諸帝后忌辰嘉
靖以前行于奉先殿十八年改高皇帝后忌辰于景
神殿文皇帝后以下于永孝殿二十四年仍行于奉

先殿凡內殿祭告自萬歷二年後親祭則祭品告文
執事皆出內監遣官代祭則皆出太常唯品用脯醢
者即親祭亦皆出太常萬歷十四年禮臣言近年皇
貴妃冊封祭告奉先殿祝文執事出內庭而祭品取
之太常事體不一夫太常專主祀享而光祿則主膳
羞內廷祭告蓋取象于食時上食之義也宜遵舊制
凡祭告內殿無論親行遣官其祭品光祿寺供唯告
文執事人親行則辦之內庭遣官則暫用太常寺從

之

蕙田案明代時享之禮天子親行盡革唐宋
以來賞賚陋例可謂撥雲霧而覩青天矣世
宗建九廟定特祭祫享之制尤為追慕古昔
而奉先殿日享月薦孝思盎然較之宋之齋
薦神御殿不更霄壤哉

右明廟享

五禮通考卷九十六